

§ 33, malillugu aalajangiivigisassatut siunnersuummik malittuaniittumik Inatsisinut Ataatsimiititaliamut ilaasortat matumuuna saqqummiussipput:

Suliamik suliaqarnermut atatillugu Ombudsmandip taartaallunilu Ombudsmandiusup peqataasinnaassuseqannginnerup nassatarisaanik suliarinnissinnaanngitsutut imminnut nalilerneranni, sulinasuartitassamik taartaalluni Ombudsmandiusussamik toqqaanissamut Inatsisinut Ataatsimiititaliap Inatsisartunit piginnaatitaaffiligaanissaanik Inatsisartut aalajangiivigisassaattut siunnersuut.

(Isak Hammond, Inuit Ataqtigiit, Justus Hansen, Demokraatit, Doris Jakobsen, Siumut, Storm Ludvigsen, Inuit Ataqtigiit, Kristian Jeremiassen, Siumut)

Tunngavilersuut:

Ukioq manna siusinnerusukkut naammagittaalliummut atatillugu suliamik suliarinninnermi peqataasinnaassuseqannginnerup nassatarisaanik suliarinnissinnaanani Ombudsmandi nalunaarpoq.

Tamatuma malittuanik Folketingip Ombudsmandianut Inatsisartunilu taartaalluni Ombudsmandiusumut Jørgen Steen Sørensenimut suliaq Inatsisinut Ataatsimiititaliamit tunniunneqarpoq.

Kisianniuna suliamut pineqartumut tunngatillugu taartaalluni Ombudsmandiusoq aamma peqataasinnaassuseqannginnerup nassatarisaanik suliamik suliarinnissinnaanani Inatsisinut Ataatsimiititaliamut nalunaartoq.

Siornatigut taamatut nalaassisoqarnikuunngilaq, inatsisilianilu atuuttuni taamatut pisoqarnerani suliamik ingerlatseriaatsimik aalajangersagaqarani.

Ombudsmandip toqkkut qimagunneratigut utaqqiisaarutaasumik Ombudsmandiusussamik toqqaanissamut Inatsisinut Ataatsimiititaliap matumali siornatigut piginnaatitaaffeqareerpoq. Tamanna assigalugu suliami aalajangersimasumi Inatsisartut Ombudsmandiata taartaallunilu Ombudsmandiusup suliarinissaanut periarfissaqarfiginngisaanni, sulinasuartitassamik taartaalluni Ombudsmandiusussamik toqqaanissamut Inatsisinut Ataatsimiititaliap Inatsisartunit piginnaatitaaffilerneqarnissaanik Inatsisinut Ataatsimiititaliap siunnersuivoq.